


霍廷軍紀畧



建軍紀念



軍紀略卷五

銅梁陳昌世五編輯

門人

吳樹棠
王澤

全校字

壬戌同治元年

正月鮑公補授浙江提督

時當建元之始 朝政一新自去秋霆軍肅清江西曾公

國荃克復安慶多隆阿公克復桐城陳玉成因以授首東

南大局漸有轉機朝廷乃於將帥諸臣中 獎勵一二特

出之人以期大功速成元旦

特詔欽差大臣曾國藩以兩江總督協辦大學士明日

特諭曰湖南綏靖鎮總兵鮑超深諳將略屢著戰功上年正月破黃文金大股於洋塘五月破劉瑯琳於赤岡嶺七八月間克城破敵馳驅二千餘里肅清江西全境厥功甚偉著賞穿黃馬褂以示優異十七日奉

旨浙江提督著鮑超補授曾文正公於二十二日奏言鮑超一軍與賊搏戰於青陽城下不能遽克即使克復而尙有石埭涇縣等城爲賊所踞未能遽抵甯國又安能進援杭湖聞蘇常之賊守禦並未稍懈似尙無可乘之機而左

鮑兩軍隔蘇常各八九百里必經過江南十數縣有賊之地前有堅城後無糧路將軍心之立潰實寸步而難行必俟左宗棠圍攻嚴州鮑超進抵甯國浙事乃有下手之處不敢過求速效尋奉

寄諭鮑超前已賞穿黃馬褂又簡放浙江提督實缺自當益加奮勵疏通入浙之路時文正以江西爲東南扼要之地又爲東征餉源儻浙賊竄入仍須鮑公回援霆軍旣應留作活兵若遽謀進攻甯國適成滯著故鮑公感荷殊恩急圖報稱屢請添兵以合青陽之圍而文正不許

二月鮑公合青陽之圍賊將張遇春來降

朱唐兩軍爲徽州之賊所牽不能符進兵石埭會勦甯國
原議而鮑公以孤軍久屯堅城之下兵勇欠餉至八九箇
月石太諸悍賊日夜伺隙謀來解圍曾文正公甚危之鮑
公於十五日飭劉順隆等先平西北門山嘴賊壘濬治長
濠爲四面合圍之計賊勢大促僞將佐張遇春率萬餘人
乞降鮑公納之簡其精銳三千編爲春字營同時曾公國
荃在蕪湖等處亦有編降卒爲崑字營之事文正俱批令
能戰者當勇每日給錢百文不能者當夫每日給錢七十

文文正奉初四日

寄諭鮑超進攻甯國之師曾國荃進攻巢縣和州之舉著該大臣分別檄催勿稍遲緩又奉十四日

寄諭鮑超圍攻青陽是何情形仍增懸繫又奉二十四日寄諭薛煥奏湖州危急請飭催鮑超速由西路援救較爲捷近等語前據曾國藩奏稱該提督尙在青陽與湖州音信難通此時已否前進卽著該大臣飭令速攻甯國取道廣德進援湖州最爲要著如果鮑超兵頓堅城猝難攻入仍須咨商左宗棠迅速設法援應湖郡毋稍延緩

三月鮑公擊退援賊悉毀青陽逆壘克其城遂連克石埭太平涇縣三城

自青陽合圍後城賊復潛糾浙江死黨三萬餘眾踞銅陵之順安鎮進撲銅陵去青陽百餘里鮑公念銅陵不守賊且竄大通斷我糧路不如先往破之初六日夜自率一軍偃旗息鼓倍道疾馳四鼓時抵銅陵後山圍獲守卡賊數十人訊之乃知山下一望無際纍纍然皆賊壁壘燈火無光刁斗無聞蓋賊不料官軍之能至此也夜嚮晨鮑公卽揮令顏紹榮黃慶王衍慶等分頭攻撲縱火焚其壘卡賊

從夢中驚醒一時瓦解土崩仍向蘭陵而走適銅陵守將
周萬倬水師總兵唐學發亦率隊來會各軍合力奮追三
十里遂將橫塘箬山東西王村直至順安沿途百餘卡二
十六壘一律剷除擒斬無算方鮑公之破賊也守城官軍
亦不解何處援至及知爲鮑公感深次骨追賊回堅請入
城休息鮑公不可仍連夜馳還先是青陽賊目古隆賢屢
爲鮑公所挫畏伏城中百計誘之戰不敢出至是偵知鮑
公分兵往援銅陵陰結涇石太等縣悍賊在南門外豬婆
店增築九壘以阻援師通糧路伺我之瑕以逞狡謀乃結

壘甫成鮑公已振旅而還卽於十五日督飭將士分九路
齊進古逆親帶龍旂老賊揮令各壘傾巢抵敵勢極猛鷲
我軍奮勇爭先以一當十明興伍華瀚以騎隊裏賊賊懼
返巢仍復倚壘施鎗死拒唐仁廉譚勝達於煙焰中拔開
鹿角踰濠直上一壘旣破眾壘盡亂馮標等乘勢薄之不
逾時而九壘悉平古逆率餘匪遁往石埭軍士追殺四十
里始收隊鮑公念南路旣平利在速攻以西門屬婁雲慶
等以東門屬譚勝達等以北門屬王衍慶等以楊應魁等
爲游兵十六日天甫向曙各營秣馬蓐食銜枚疾進將近

城闐城上萬礮雷轟附城卡壘中亦以火藥悉力抵禦諸將弁更番奮攻賊知不敵急退入城我軍毀壘填濠進次城下熊鐵生劉順隆挽盾自障攀堞先登眾軍乘之立將縣城克復斃賊萬餘人逆首僞游天義及各僞職共八十六名悉就擒縛鮑公在青陽息軍三日乘賊立腳未定計先取石埭太平以固嚴州之防繼取涇縣以達甯國之路二十日次軍龍口二十一日率隊前行直抵石埭城壘各賊伏匿不出鮑公分軍爲五合圍之附郭壘賊穴牆施礮鮑公令我軍佯卻數武使賊稍懈突將火藥環壘飛擲各

營乘賊駭亂之時囊土填濠而進悉踣十四壘平之將衝出之賊盡驅入城城上矢石交下將弁頗有傷亡婁雲慶李文益等帶領眾軍士各負片板直薄城根蕭信春身受數創猶復往來衝突奮力急攻遂從西北二門斬關而入立復城池追擊敗賊二十里殲斃五千有奇俘四百人石埭旣復賊愈惶懼因糾合援賊二萬餘由涇縣南陵而來羣集於甘棠鎮二十二日鮑公率軍倍道疾馳遙見賊隊如蠅如蟻密排十數層勢甚梟悍急令文九和等三營從中路進擊劉順隆王衍慶等六營分兩翼包抄戰數時賊

屢卻屢前馮標伍華瀚等忽由山後揚旗吹角整隊齊出
衝動賊陣不復成伍盡棄甘棠營壘十七座而逃我軍悉
力追逐進薄太平縣西門譚勝達先毀高山四壘引軍齊
上俯瞰城中因以火箭環射延燒藥局煙焰蔽天賊驚潰
啟東門望涇縣大道而逸各軍分投掩襲一路積尸若阜
流血沒脛俘獲較石埭爲尤多擒僞主將徐國華等三十
七人張遇春之乞降也鮑公以勁敵在前遽收降眾恐生
他變諭令暫住旌德之三溪俟立功後再議至是古逆由
太平遁出黃華嶺外所率敗匪不滿七八千將圖折入三

溪潛結遇春之眾竄併涇縣行甫數里見遇春整隊而來
出賊不意縱橫格鬪賊大錯愕望密箐叢莽中踰嶺急遁
遇春入山搜捕擒殺近四千人古逆一股幾無孑遺時鮑
公已回軍甘棠旣得遇春獻捷之信旋聞涇賊將由灣灘
至鳳村上竄二十七日率軍並挾遇春降卒以進將及鳳
村賊已遁回灣灘我軍疾馳薄灣灘下寨二十八日鮑公
先派遇春擇險設伏自督八營連環進擊使出壘之賊不
得少休令翦炳南梅仁富等潛出左右路遇春伏兵從後
路如牆壓下賊惶懼失措不能歸壘唐仁廉等搃旗縱馬

直擣中堅盡破灣灘卡壘躡賊尾追至於涇縣城下仁富
先拔西門水卡仁廉等隨毀東南土壘一擁入城登時克
復斬獲甚多曾文正公自聞銅陵之捷卽致書鮑公云銅
陵之役實非兄意料所及讀捷報在座無不踴躍稱奇同
聲呼快者雖李郭用兵何以過此只候青陽克捷卽當據
實入告至是先後奏捷略云青陽一城淪陷十載繫皖南
之門戶據江介之要衝自上年定計以來相持四月踞守
益堅仰賴

聖主福威諸將用命卒能掃蕩援賊攻拔老巢從此規取

甯國可分浙賊之勢關繫頗大厥功甚偉石埭太平南蔽黟歙涇縣東達宣城爲戰守所必爭鮑超一軍自拔青陽而後仗

聖主之威席全勝之勢未逾七日連復三城從此羣蠭喪膽籌勦甯國較有把握鮑超身先士卒調度得宜惟係專閩大員應如何

加恩之處未敢擅擬等語當青陽捷聞奉

上諭官軍擊退大股援賊攻克青陽縣城勦辦甚爲得手浙江提督鮑超身先士卒調度得宜著交部從優議敘並

發去白玉搬指一個碧玉煙壺一個白玉柄小刀一把白玉佩一塊交鮑超祇領以示優獎其尤爲出力各員弁除明興已簡放乍浦副都統婁雲慶已簡放直隸正定鎮總兵外婁雲慶著再賞給二品封典甘肅涼州鎮總兵馮標著賞加提督銜副將譚勝達王衍慶劉順隆熊鐵生陳得勝顏紹榮唐仁廉均著交軍機處記名遇有總兵缺出請旨簡放劉順隆並賞給壯勇巴圖魯名號唐仁廉並賞給二品封典總兵黃慶宋國永張玉田均著賞給二品封典副將劉玉堂李文益段大貴李定貴蕭儀斌周有勝蔡得